

25. februar 2016

Inatsisartut suleriaasianni § 37 naapertorlugu matumuuna Naalakkersuisunut apeqqutinik imaattunik saqqummiussivunga:

Naalakkersuisunut apeqqutit:

- 1. Naalakkersuisut uppersarsinnaanerpaat, Namminersornerullutik Oqartussat nalunaarutaat nr. 20, 19 november 2007-meersumi § 2, nr. 3 naapertorlugu kommunit pisussaatitaasut nunatta avataaniit suliffissarsiortut akuerineqartut itigartinneqartulluunniit amerlassusaat Naalakkersuisunut nalunaarutigissallugit?**
- 2. Kommunit taamatut pisussaaffeqarnertik eqqortippaat?**
- 3. Taamaattoqanngippat: Aaliangersaakkap siunissami malinneqarnissaa isumannaarniarlugu Naalakkersuisut qanoq iliuseqarniarpat?**
- 4. Avataaniit suliaartortartunut tunngasunik kommunalbestyrelsit paasisutissanik nalunaaruteqartarnissaat pillugu Namminersornerullutik Oqartussat nalunaarutaat nr. 20, 19 november 2007-meersoq atuutsinneqalermalli, kommunit inatsisartut inatsisaat naapertorlugu, qinnuteqaatit akuersissutit qassit, kiisalu itingartitsissutit qassit tunniusimavaat?**

(Inatsisartunut ilaasortaq Per Rosing-Petersen, Partii Naleraq)

Tunngavilersuut:

Naalakkersuisut § 37-i naapertorlugu apeqqummut nr. 301/2015-meersumut imatut akissuteqarput:

“Inatsisartut peqqussutaat nr. 27, 30 oktober 1992-meersoq kommuninit aqunneqarpoq, suliffeqarfiit qinnuteqaataat avataaniit sulisoqarniarneq pillugu aaliagiisarput,

qinnuteqaammut akuersissanerlutik imaluunniit itigartitsissanerlutik. Aaliagiinerit tamatumanga aallaavillit Namminersorlutik Oqartussanut nalunaarutigineqartanngillat, tamaattumillu peqqussut qanoq akulikitsigisumik atorneqartarnersoq ilisimanngilarput.”

Akissutip tupaallatsingaatsiarpaanga.

Januaarimi 2016-imi Kalaallit Nunaanni Naatsorsueqqissaartarfiup kisitsisaatai naapertorlugit nunatsinni suliffissarsiortut 4.031-iupput. Suliffissarsiortut taamannak amerlatigitillugit Naalakkersuisut, aammalumi Inatsisartut soorunami soqutigisarissavaat Kalaallit Nunaannut suliffissarsiortut killilersimaarnissaat pillugu Inatsisartut inatsisaata atuutsinneqarnerata isumannaatsumik

Kisitsisit taakkorpiaat Namminersorlutik Oqartussat pisarsiarisarsimassagaat uanga naatsorsuutigigaluarakku, una naapertorlugu: (*Kalaallit Nunaannut suliaartortartunut tunngasunik kiisalu Suliffeqarnermut, suliffissarsiortut ilinniagaqalerniartullu sulilersinneqartarnissaannut tunngatillugu kommunalbestyrelsit paasisutissanik nalunaaruteqartarnissaat pillugu*) Namminersorerullutik Oqartussat nalunaarutaat nr. 20 19. novembari 2007-imeersumi § 2 normu 3-mi kiisalu Suliffeqarnermut, suliffissarsiortut ilinniagaqalerniartullu sulilersinneqartarnissaannut tunngatillugu aaliangersaasoqarsimammat kommunalbestyrelsit pisussaaffigaat Suliffeqarnermut Inuutissarsiutinullu ilinniartitaaneremut Pisortaqarfimmut (Maanna Inuussutissarsiornermut, Suliffeqarnermut Niuernermullu Naalakkersuisoqarfik) avataaniit suliaartortartunut tunngasunik kommunalbestyrelsit paasisutissanik akuerisat itigartitallu immikkoortilugit nalunaaruteqartarnissartik pisussaaffigaat, taakkuli branchenut aamma immikkoortinneqartussaapput.

Neriuppunga Naalakkersuisut Nalunaarutip suli atuunnera uppersarsinnaassagaat kiisalu kommunit nalunaarummi § 2 nr. 3 naapertorlugu nalunaartussaataitaanerat atuutsinneqartoq.

Ullut suliffiit qulit qaangiutinnginnerani akineqarnissara kissaatingaara.